



## **KENYATAAN MEDIA**

### **UNTUK SIARAN SEGERA**

#### **BANTUAN PENGAJIAN KPT-PTPTN PRIHATIN BANTU PELAJAR USM**

1. Perbadanan Tabung Pendidikan Tinggi Nasional (PTPTN) sebagai agensi di bawah Kementerian Pendidikan Tinggi (KPT) sentiasa prihatin mengenai kebajikan para pelajar khususnya peminjam PTPTN dengan menyediakan pelbagai inisiatif untuk manfaat pelajar. Justeru, inisiatif Bantuan Pengajian KPT-PTPTN Prihatin diadakan untuk menyalurkan bantuan sara hidup kepada pelajar yang kurang berkemampuan di Institusi Pengajian Tinggi (IPT) dan meringankan beban kewangan pelajar.
  
2. Pada hari ini, penyampaian Bantuan Pengajian KPT-PTPTN Prihatin kepada pelajar Universiti Sains Malaysia (USM) telah diadakan di Masjid Al-Malik Khalid USM sempena Majlis Iftar USM yang disempurnakan oleh YB Dato' Seri Mohamed Khalid Nordin, Menteri Pendidikan Tinggi. Turut hadir YBhg. Dato' Seri Dr. Awang Adek Hussin, Pengurus Lembaga Gabenor USM, YBhg. Profesor Dato' Ir. Dr. Abdul Rahman Mohamed, Naib Canselor USM dan Encik Ahmad Dasuki Abdul Majid, Ketua Eksekutif PTPTN.
  
3. PTPTN telah memperuntukkan sebanyak RM231,000.00 kepada 462 orang pelajar di USM yang merupakan peminjam PTPTN daripada golongan miskin dan miskin tegar. Setiap pelajar yang layak telah menerima bantuan sebanyak RM500.00 secara one off dan disalurkan ke dalam akaun bank pelajar. Pelaksanaan program ini juga adalah dengan kerjasama Unit Penyelarasaran Pelaksanaan (ICU), Jabatan Perdana Menteri dan USM bagi memastikan penerima adalah dari kumpulan sasaran yang layak.
  
4. Diharapkan inisiatif Bantuan Pengajian KPT-PTPTN Prihatin ini memberi sinar kepada para pelajar untuk terus mencipta kejayaan hebat dalam akademik dan sahsiah, sekali gus menjadi kebanggaan ibu dan ayah.

5. PTPTN yang ditubuhkan pada tahun 1997 telah diamanahkan untuk menyediakan pinjaman pendidikan kepada warganegara Malaysia yang berjaya melanjutkan pengajian ke IPT tempatan sama ada awam atau swasta yang diiktiraf oleh kerajaan. Selama 26 tahun penubuhannya, peranan dan jasa PTPTN telah melahirkan ramai modal insan yang berpendidikan dan menyumbang kepada pembangunan negara. PTPTN akan terus komited sebagai penerajui tabung pendidikan tinggi negara.